

KERWEREDD 1988



vorgetragen von Kerweborsch Dietmar Post

Er liewe Leid ich griß eich all in unserm scheene Rousetal,
ich hoff er field euch wohl
bei Weck Woschd un Alkohol
den gure Riwwelkuche nett zu vergesse
doch dut eich blous nett - iwer lore
des rot ich eich ehr Leit
nett daß de om Kerwemondog im Seifutter leit.
seid also lustig un frou,
doch fong glei mim Joresrickblick ou :

Er Weibslaid macht Deern un Fenschten zu
don zeit neieschdem treibt sich bei uns rum sou en Filu
un dut iwerol umherstreife
um sich an Fraue zu vergreife
seid also uff de Hut
demm gehejert odentlich ons uff die Schnut
noch besser is, er dret em on de Latz
dann hejerd er uff der Sauwatz
Ich deff gar net drou denke
des muß ich escht emol nunner schwenke....

Prost

Gut verloffte is die HABAFa
dank unserm Presidendem Adolf Staffa
der is gonz gut , des is kon Spott
wonn er a sou en belastende Vornome hot
um unser Dorfmusikante er Leit ,
wenn me fun iwerrol beneid
un alle Aktöre wan voll debei ,
nur sou gelingt echte Narredei ,
doch den Roine Hons misst me belonge
weil er mit soim Motto uf Hepprum is fremd gonge ,

do isser bei monchem ougeeckt ,
doch wie ich den kenn ejert der sich nett
un wonn er vor Zonn verreckt
doch die olde soll me gut holde
des gild besonders vo den Franz Walter
er hatte große Resonanz
unser Oldheimer Franz ,
zusamme fassend de Fazit :
Im negschte Jor macht alles were mit
dodruff du ich moi Glos erhewe ,
die Fasnocht , die soll lewe....

Prost

In Owerhomboch hot sich des Johr ebbes gedu
des eschde Dorffest war der Clou
bis Mojens frieh ging die Feiererei
un die Oso die war a debei ,
wie die Idealiste des gemeistert
alles war hellauf begeistert .
die Owerhombescher brauche sich nett zu scheeme
do kann sich manscher e Beispiel nehme .
seit die Huthoge on die Kerscheorgel sin kumme
hot me de Bitsche Willi fo die Kerwered de Wind aus de Segel genumme .
endlich hot me des gemocht
un de Kaplon hot sich ins Feischtel gelacht

die Kersch hot Desjohr grous Jubileum
des is schun en Grund fo e Tedeum
un fun all dem gonze de Regissoer
is unser Parrer Lothar Röhr ,
nett blous in de Kersch singt er Haleluia
er macht a mit bei allem Halotria
noch dem Grundsatz ora et labora
noch dem Motto honelt a gonz konkret
gonz unne im Dorf de Nehrs Alfred
wos der fo die Kerschekronik schafft
geng monschem Junge iwwer die Kraft ,
a nett zu entbehrn un fo die Gemoinde gut
is die Parrköschin un die Schwester Gertrud ,
un im Parrgemoinderat de Chef
des is de Tilgers Josef .
im Griff katt hor er die Sach im nu
de Hedi biet er alsemol Ruh

die macht in de Faschtezeit Wallfahrt
noch ST . Praline
doch ohne Hedi wers blous halb sou schee
die Fraa singt schee laut un foi
un die gonze Kersch fellt oi
Prost Tande Hed
ich trink emol en Woi....

Prost

In de Wasserschepp hot oni in aller Rasch
ejn Rock ougezoch bis iwwer de.... Po
un wie se de Rock hot ou
merkt se , daß de Knop koum noch drou
un weil zu allem iwwerdruß
a noch kaputt de Reisverschluß
rennt se glei donn gonz konfus
bis nunner on die Scholzebrick
un denkt nanu ich we verickt
sie griecht en gewaltische Schock
uf em Borrem leid de Rock
grod om Roschdische Messer fonne
hot se im Hem do gschtone
un denkt des deff nett wohr soi
is schnell zu de Elfriede noi
die hot re e Sisicherheitsnodel gewwe
das die Leid nix mej zu lache hewwe
des war vielleicht en Spaß

Moral : Stripptiis macht me nett uff de Gas

Momme ich mach emol die Gorgel naß....

Prost

In de Wasserschepp war noch sou en Schlaue
sou en Bonseiwinzergasebauer ,
im letscht Herbst war es gewese ,
horre 14 Tog frieher soi Trauwe geleese
hot alles noi gepackt in soi Schees ,
oinschlieslich demm gurre Gasekees ,
is noch Fronkfort uff die Zeil
un hielt dort soi Producte feil .
donn funn de Frieleese de Woi
bring mej wie die Spätlese oi .

Homzu is er noch in en Stau gerore
doch was er oigenumme hot horre nett verrore ,

die Moral von der Geschichte :
Er Leit machts a sou , donn grigt er nett die Gasegisch ,

de Monn war gscheid
Prost er Leid....

Prost

In de Stroß der Wertheimer

wohnt funn de Feierwehr en Oldheimer
der dutt in Ruh soin Auspuff schweiße
uff o mohl greischd er sou e Scheiße
im nuh hot dem die But gebrennd
aus allne Rischdunge kimmt die Feierwehr gerennt
die sin ougebraust wie en Taifun
die won eje do wie de Walter in de Kersch un in de Singstun ,

die Moral : Niemand kann garrantiern
daß souwos a em Feierwehrmonn kann bassiern

Ich muß emol moi Stimmbender schmiern....

Prost

Seit de Staffas Leo hot de Fiererschoi
horre ko Wasser mej in soim Woi .
was wo doch der Monn sou frou
er hot glei e Mercedesschild on soi Audo vonne drou
un hot gedenkt mit dere Persönlichkeitsprotes
fert se 200 km die old Schees
doch weil er blous 25 km deff fahn
do driwwer dut sich soi Frau frahn
don fehrt ä fott der dolle
don konnen soi Fraa zu fuß oiholle
doch de Leo wett des nett jucke

Prost Leo ich muß emol one schlucke....

die Jochtversammlung war des Johr in de Wasserschepp draus
bei de Feierwehrgeneralversammlung im Gerätehaus

des war vielleicht e Jocht
do hots oddentlich im Gebälk gekracht
des war vielleicht e Ding
Kommandant is jetzt de Roland Wilfing
der Mann is jung der hot noch Pfiff
de Michel is jetzt Hilfscheriff
de Roland hot des gonze in de Händ
der rennt wons brennd wos e Glick
uff die Grick un werre zurick

Beim TSV leeft alles weiter uff de selbe Spur
vor allem hewwe se jetzt e neji Kultur
beim DRK is alles klar
den Vorsitz hot werre die Maria
un doruff sin me Stolz
denn die is aus em reschte Holz ,
De Gsongveroin steigt höher uff de Erfolgsleiter
dank ihrem klewweren Chorleiter
des is wohr , des is kon Schmu
denn schließlich keje ich a dezu
un wer nischt liebt Gesang , Wein und Frauen
dem gehört auf die Gosch gehauen....

Prost

Als letschdes wend ich mich als Kerweparre
on die fromme Autofahrer
wonn die om Wochenende fahn in die Kersch
denn parke die gonz iwwezwersch
im obstand fun 2-3 Meter
daß do kon onne dezwise kimmt , was ein jeder ,
wonn isch des seh denn denk ich
kenne die blous sich ?
endweder dunn die nett on onnern denke
oder sie kenne rickwärts oischwenke
denkt on eije Mitmensche bei allem Betrieb
denn des kejert a zur Christlichennächstenlieb

jetzt sin bestimmt die Fußgenger frou
doch lacht nett sou frieh jetzt kummt ej drou
wonn do die Kersch is aus
keijn die zu 4 zu 5 newenonner nach haus
kon Autofahrer nimmt denne des grumm

doch wehe es hupt oner , donn dreje die sich escht emol um
donn gucke die mit bäisemm Blicke
um ej Neigier zubefriedige
un denke wos hupt donn der sou fresch
schließlich war isch in de Kersch
ich glab der hot en Splien
doch bedenkt ons , der Autofahrer war a drin
geit also escht uff die Seit un dut eije Neigier nunnerschlucke
wonn er vebei is kennt ej als noch gucke
nemmt mes nett grumm , nemmts mit Humor
daß des in Zukunft kimmt nett mej vor
ich was dutt me die Worret soche
gejn monsche om glei on de Groche
die Worret soche is nett grod bequem
ob me Blüm hast oder Lafontään
doch holt verehrtes Puplikum bevor ich in die Politik jetzt kumm
e Kerwered is jo ko Panoptikum
un bevor ej misch vermalledeit
mach ich lieber schluß vo heit
donn schließlich will ich moi Red net verhunze
dann awel muß ich emol schnaufe

ruf ich eich zu : " Wem is die Kerb ? " "Unser"